




PURE EPETOMA 2026

Tianuare 4 - 11

Tumu Tapura/Theme: KO IEHOVA TE ATUA TA MATOU E AKATIETIE, NONA
TE INGOA TA MATOU E AKAPAAPAA KARE E VATA.
*(In God We Make Our Boast and Praise His Name
Forever)* Salamo 44: 8



Akamaaraanga ia ratou tei rave maroiroi i te angaanga na te Atua e kua akangaroi

*Tataia e te au Orometua o Rarotonga
Neneia, imereia ki te katoatoo*

Tiunu 2025

KO TE PURE EPETOMA

Manako Maata: KO IEHOVA TE ATUA TA MATOU E AKATIETIE
NONA TE INGOA TA MATOU E AKAPAAPAA KARE E VATA. (*In God
We Make Our Boast and Praise His Name Forever*) Salamo 44: 8

Kia Orana akaou tatou i te aroa maata o to tatou Atua i roto teia Mataiti Ou.
Koia tei apai ora mai ia tatou na roto i te Mataiti ta tatou i aere mai, irinaki au e
no roto mai tatou i te au taai anga o to tatou oraanga no te aroa tumatatini ra o
te Atua kua rauka ia tatou ora. i roto i to tatou Pure Ebetoma, kua raveia mai te
reira mei roto i to tatou tuanga tia no teia Ebetoma.

Tena tei akaupoko'ia ki runga i te Atua Okotai, tei anga i te rangi, te enua e te
au mea tini ravarai e tae mai kia tatou te tangata nei. Kia kite oki tatou e, koia
anake ta tatou e akatietie me kare ra, koia anake ta tatou e akaparau. Teia te reo
o Paulo, ***“Auraka rava ra toku ei akatietie anga ke mari ra i te Satauro o to
tatou Atua Iesu Mesia i riro ei teiane ai ao ei mea akasatauroia iaku, e ko au
oki i teiane ai ao”*** (Galatia 6:14)

Kia riro te ingoa o te Atua ei kite anga no tatou e kare rava atu e ingoa e ora ai
tatou mari ra i te ingoa o to tatou Atua ko Iesu Mesia. Kua pera katoa oki ki tana
Tamaiti akaperepere, Tana i tono mai ki roto i teiane ai ao, e ko tei oronga mai i
tona ora no tatou, e kua puakapa mai ki o tatou nei.

Kua kitea tona kaka e tana i rave, no to te ao katoatoa. Kia riro katoa te Atua ei
akatietie anga na tatou i roto i teia Mataiti, e ki roto katoa i te taokotai anga o to
tatou au ngutuare ki roto i to tatou basileia. I teia tuatau nei, te iti uatu nei te
aronga e akapaapaa nei i te Atua, mei teia te tu, te iti uatu nei te au tangata e
aere nei ki te pure, te ngaa nei te au are toa mamaata, kare e akono akaou ia ana
te ra Sabati. Te tuera nei te au makete no te au pai turoto e tapae mai nei i te ra
Sabati. Tera i reira te aiteanga, kua kore te kaka o te Atua i roto i te ngakau
tangata i teia ra.

E te kopu tangata o te Atua, teia te reo o te Tata Salamo: ***“Kia rekareka matou
i te ora naau, e i te ingoa o to matou Atua, ka akatu ei matou i te reva: kia
akatikaia mai e Iehova te au mea katoa taau i pati ra”*** (Salamo 20:5) “Mou i



te mea tika, piri kia Iesu, e vaka autu rai to Daniela” Eaa i autu ei? “Kua akatietie oki i te ingoa o Iehova, e kua akapaapaa, e kare e vata”

PURE:

E te Atua e, noou te ingoa ta matou e akatietie e ko koe anake te Atua ta matou e akapaapaa e tuatau ua atu. Noou te mana e te kaka e ope uatu Teiane i ao Amene.

POPONGI SABATI 4 TIANUARE

Manako Maata: KO IEHOVA TE ATUA TA MATOU E AKATIETIE
NONA TE INGOA TA MATOU E AKAPAAPAA KARE E VATA. *(In God
We Make Our Boast and Praise His Name Forever)* Salamo 44:8:

Tumu Tapura: KO IESU TE LOGO – (Ioane 1:1 – 12)

Te Au Irava Tauturu:

- Isaia 49:6 Ei turama
- Salamo 33:6 Na te tuatua a te Atua i oti ei te ao nei
- Hosea 1:2 Ko te akamata anga o te tuatua a te Atua kia Hosea
- Ioane 20:30 – 31 Kia akarongo ia Iesu
- Ioane 3:6 Te anauanga a te Vaerua

Tatara'anga:

Te karanga nei a Ioane: ***“I vai ana te Logo i muatangaana, i te Atua ra oki te Logo, e ko te Atua oki te Logo”*** (Ioane 1:1) I roto i te Evangelia ta Ioane e tata nei, te akamarama mai nei aia mate akapapu mai e, ko Iesu tikai te Tamaiti a te Atua, e na roto i to tatou irinaki anga ki roto iaia ka rauka te ora mutukore. Kua akapapu katoa’ia e, kua tae mai aia ki te ao nei i roto i te Kopapa e pera katoa Tona tu Atua. Ko te Logo, e tuatua teia tei vai i taito roa, ta te iti tangata Eleni i matau i te kite e, ko to ratou ia Atua. Ei akamarama anga na Ioane kia marama ngoie ua te tangata e ko te Logo tana e tuatua e kare i te potonga rakau mari ra e Atua tei aere a tangata mai ki teiane i ao nei, mei tei tuatuaia e te Aposetolo Ioane i te nakoanga e: ***“Ko te Logo ra, ko te ora i vai ana i***



muatangana, ko ta matou i akarongo akeni, ko ta matou i kite ake nei i to matou mata, ko ta matou i akara, e ta matou i aa i to matou rima” (1 Ioane 1:1)

Te apai nei te manako o Ioane ki runga i te Atua tei tono mai ia Iesu ki te ao nei, tei aere a tangata mai ei turama i tana tuatua ki te tangata kia ora to te ao nei. Kua tuatua rikiriki mai aia ki te au Peroveta, kare tetai papaki i akarongo. No reira kua eke a tangata mai aia kia kite te tangata iaia, inara noatu e kua puakapa mai aia ki o tatou nei kare te tangata i ariki iaia. Te karanga nei te Irava 12: ***“Te aronga katoa ra i ariki atu iaia, i o maira aia i te tika ia ratou kia riro ei tamariki na te Atua, koia te aronga i akarono i tona ingoa”***

Te karanga nei Mataiao 3:17 ***“E ina ko te reo maira mei te rangi mai ite nako anga mai e, “Taku Tamaiti akaperepere teia, Kua mareka rava au iaia”*** E mea akaaroa ra, aere mai aia ki ona tikai, kare tona iti tangata i ariki iaia. No reira eiaa e ekoko na te Logo, koia to tatou Atu ko Iesu, Nana e apai ia tatou ki roto i tona basileia.

Uianga:

1. Ko Iesu te Logo, akamarama mai i taau i kite?
2. Te akatietie ainei koe ia Iesu i te au ra katoatoa?

AVATEA SABATI 4 TIANUARE

Manako Maata: KO IEHOVA TE ATUA TA MATOU E AKATIETIE
NONA TE INGOA TA MATOU E AKAPAAPAA KARE E VATA. *(In God
We Make Our Boast and Praise His Name Forever)* Salamo 44:8:

Tumu Tapura: KO IEHOVA TO TATOU MANAKONAKOANGA ORA.

Te Au Irava Tauturu:

- Salamo 69:36: Akaraanga i te ora ki te Atua
- Ioane 11: 9, 10: Ko Iesu te marama ora
- Ioane 11:6 Ko te akapumaana ora
- Angaanga 1:21 Topiri ki te Atua

Tumu Tapura: I RIRO MAI NEI TE LOGO EI TANGATA

Te Au Irava Tauturu:

- Ioane 1:14: I riro mai nei te Logo ei tangata.
- Luka 1:31 – 35: Ka eke mai te Vaerua ki rungao ia koe.
- 1 Timoteo 3:16: E tuatua ngaro maata to te akarongo.
- Galatia 4:4: Kua tonono maira te Atua i Tana Tamaiti.
- Ebera 2:16 – 17: Kia riro aia ei Taunga Maata tuatua mou.
- 2 Petero 1:17: Taku tamaiti akaperepere teia.
- Ezekielia 36:25, 26: Ngakau ou i roto i te Atua.

Tatara'anga:

Kua akara te Aposetolo ko Ioane na roto i te mata o te aeto i te kite mamaoanga i te tuatua no te Tamaiti a te Atua. Kua akamou katoa oki aia i te tuatua o te Logo ki runga i te Atua e tae ua atu ki tana aakianga e, kua riro mai taua Logo ra ei tangata. Kare katoa oki teia turanga nei i rauka ua mai na roto i te manako tangata, mari ra, kua aru te reira i te au akanoonoo anga i taito e tae ua atu ki tei totou'ia i taito e te au Peroveta. Kua tonono mai oki te Atua i tana Tamaiti ki roto i teiane ai, kia riro ei ora no tatou. Kua riro katoa aia ei Taunga Maata tuatua mou no tatou i roto i tona uaorai Vaerua.

Ko te aronga tei ariki'ia ki roto i te Kopu tangata o te Atua, kua tau'ia to ratou oraanga ki te oraanga ou, kua akaanau katoa'ia ratou e te Vaerua. Kia tau ki ta Ioane 3:8 i tata: ***“Te arara ua nei te matangi i tana ngai i anoano ra, te kite ra koe i tona aruru, kare ra koe i kite i te ngai no reira mai aia, e te ngai e aere ia atu e ia ra, koia tika oki te tangata katoa ta te Vaerua e anau ra”*** Na roto oki i te akarongo e rauka ei te reira turanga, kia kitea te aroa maata o te Atua. Ko ta te Atua oki teia i rave no tatou, e te akara atu nei tatou ma te umere maata.

Te akakite katoa ra oki te Irava 13 e, ***“Te aronga kare to te toto i anau ei ra, kare oki i to te anoano o te kopapa, kare oki i to te anoano o te tangata, no te Atua ra”*** (Ioane 1:13) Ko ta te Vaerua oki teia i akatupu no tatou katoatoa kia kitea te kaka maata o te Atua i roto ia tatou. Nana katoa oki te akarakeianga



maata atu ia tatou i roto i te akarongo e tei na roto katoa mai i Tana uarai Tamaiti anau ta'i. Kua riro mai oki te Logo ei tangata, kua puakapa mai ki o tatou, kua kite tatou i tona kaka, te kaka e tau i te Tamaiti anau ta'i a te Metua, kua ki i te aroa ua e te tuatua mou. (Irava 14)

Me na te Vaerua o te Atua oki teia i akatupu, kare au e manako e ka oki akaou tatou ka rave i te au peu taito ta tatou i matau i te rave, koia te manako kino kia tatou uarai, te manako pae ke, te keia, te akaturi e te vai atura. Te pure nei au ki te Atua no teia Mataiti kia akaari tatou i tetai au mea ou takiri mei roto mai ia tatou e tae uatu ki vao ake ia tatou, no te mea ***“Ko te aronga katoa oki i aratakiia e te Vaerua o te Atua ra, e tamariki anake ia ratou na te Atua”*** (Roma 8:14)

Uianga:

1. I te riroanga mai te Logo ei tangata, Eaa te akairo tei kitea i roto Iaia?
2. Eaa taau akakiteanga ia Iesu i roto i teia ra nei?

MONITE 5 TIANUARE

Manako Maata: KO IEHOVA TE ATUA TA MATOU E AKATIETIE NONA TE INGOA TA MATOU E AKAPAAPAA KARE E VATA. *(In God We Make Our Boast and Praise His Name Forever)* Salamo 44:8:

Tumu tapura: KA AKARA ANA I TE PUNUA MAMOE A TE ATUA.

Te Au irava Tauturu:

- Ioane 1: 29 – 34: Ka akara na i te Punua mamoe a te Atua, ko tei apai ke atu i te ara a to te ao!
- Exodo 12:3: Okotai ngutuare okotai punua mamoe.
- Isaia 53:7: Kua takinga-kinoia oki aia, e kua tinai-mateia aia.
- Angaanga 8:32: I aratakiia aia mei te mamoe ki te tainga ra.
- 1 Petero 1:19: mei to te punua mamoe kino kore e te maki kore.
- Ioane 1:35 – 42: Eaa ta korua e kimi nei?



- 1 Korinetia 5:7: ka tamā ana i te putunga taito, kia riro kotou ei putunga ou...”

Tatara'anga:

Ko te turanga teia ta te Atua i oronga ki roto i te rima o Ioane, ta te peroveta Isaia i nakō ra e ***“E reo o tetai i te tutu aere anga i te medebara; E akameitaki i te arataa o Iehova...”*** (Isaia 40:3) kua akāri katoa mai Ioane 1:7, ***“I aere mai taua tangata ra ei kite, ei akakite i taua māmama ra, kia akarongo te tangata katoatoa kiaia”*** Na roto i te akamaka anga a Ioane i te ara o te Atu, tupu ai te uiui anga a te ngati Iuda. Kua tonono atura i te au kau taunga e te ngati Levi i te kimi marama ko ai tikai aia (Ioane) Koai koe? ko Elia ainei koe? Ko taua peroveta ra ainei koe? eaa koe i bapetizo ei, kare koe i te Mesia...? KARE i na Ioane ai, kare au i te Mesia. Ko te reo rā au...”

Kia kite Ioane i te Atua i te aere anga mai kiaia ra, kua karanga atura aia ki te au tangata i waitata iaia ra, ***“Ka akara ana i te Punua Mamoe a te Atua ko tei apai ke atu i te ara a to te ao”*** (Behold! the Lamb of God who takes away the sin of the world!) me akara tatou ki te turanga o te Punua Mamoe, ka kite tatou e, kare te tuatua a Ioane i te tuatua ua, mari rā , e akatau anga tuatua teia nana. I roto i te Kororomotu taito, Exodo 12:5 ***“Ei punua mamoe kino kore ta kotou, ei toa mamoe....”*** Ko ta te Atua akatakaanga ia i te Punua mamoe tei tau no te apai ei atinga, e tona au akanoonoo anga. E tuanga maata teia kia tatou i teia rā, ta te Atua oronga anga mai i Tana Punua Mamoe ra ei apai ke i ta tatou ara. Kare i kitea te kino roto iaia, e kare katoa e apa kia akaapa atu tatou iaia. Akapapū Ioane i te turanga o taua Punua Mamoe ra, tana i nakō ra e ***“... ko te Tamaiti teia na te Atua”***

I roto i te arataki anga a to tatou tuanga tia ia tatou i teia ra, ka kite tatou e, ko te rua teia i to Ioane taiku anga i te tuatua o te Punua Mamoe:

1. Ki te tangata e manganui tana e bapetizo ra.
2. Ki tana (Ioane) nga pipi.

Na teia i akanauru i te ngakau o teia nga pipi kia aru ia Iesu. Kia kite Iesu ia raua i te āru anga Iaia, kua ui atura, “...*Eaa ta korua e kimi nei?*” Irinaki au e, ua matau meitaki teia nga pipi i te akarongo i te tuatua o te Punua Mamoe, ta

Ioane i karanga: **“Koia oki teia taku i karanga ra, Ko te aere mai i muringao iaku nei, kua riro ia i mua iaku; ko mua oki aia iaku”** (Ioane 1:15) e kua matau katoa raua i te turanga o Ioane, e tona ngai nooanga. Ei konei kua akāri mai teia nga pipi i tetai tuanga tei umuumu ia e raua kia kite, koia oki ko te ngai nooanga o te Atu, **“...noo koe kiesa? Ka aere mai ka akara....”** Teia tei taiku’ia roto to tatou tia, **“...Aere atura raua e kite atura i tona nooanga, e noo atura ki ona i taua rā ra....”** Ko te uiaanga i konei, Eaa ta raua i kite? irinaki au e, ua kite ua tatou i te ngai nooanga o te Atu, no te mea kua karanga ana aia, **“E ana to te suoli ; e to anga to te manu o te rewa; kareka te tamaiti a te tangata nei, kare ona e urunga upoko”** (Luka 9:58) E anoano maata to te Punua Mamoe ia tatou i teia mataiti, teia tona reo kia tatou, **“Aere mai e akara....”** kia riro tatou ei iti tangata pē kore i te tavini anga Iaia. Kia kite katoa tatou e, kua aere mai te Punua Mamoe a te Atua, i te apai ke i ta tatou ara e manganui. E koia anake ta tatou e akatietie, nona te ingoa ta tatou e akapaapaa, kare e vata.

Uianga:

1. Eaa ra tetai akara'anga i kitea roto i te Punua Mamoe, tei kore i kite'ia?
2. Eaa te tuanga Maata o te Punua Mamoe tei tau no tatou teia rā?

RUIRUA 6 TIANUARE

Manako Maata: KO IEHOVA TE ATUA TA MATOU E AKATIETIE
NONA TE INGOA TA MATOU E AKAPAAPAA KARE E VATA. *(In God
We Make Our Boast and Praise His Name Forever)* Salamo 44:8:

Tumu Tapura; KUA KARANGA ATURA IESU, KA ARU MAI IAKU.

Te Au Tuanga Tatau:

- Salamo 44:1 – 8: E te Atua e! Kua rongo to matou taringa
- Ioane 1:43 – 51: Kua karanga atura kiaia, Ka aru mai iaku
- 2 Samuela 15:21 – 22: Kia riro taau koia ei koia
- Mataio 4:1 – 19: Ka aru mai iaku, e akariro au ia korua ei ravakai tangata
- Mareko 1:17 – 37: Kua aru atura Simona ma i murio iaia

- Salamo 104:2 – 5: Te angaanga ta te Atua i rave no te ao nei i te akari-
anga mai i tona mana

Tataraanga:

Kua akamou’ia to tatou nei tuanga ki runga i te tuatua a Iesu Mesia, i te tuatua’anga ki tana au Pipi, e pera katoa kia tatou i teia ra, Teia oki te reo o Iesu: Ka aru mai korua iaku, e akariro au ia korua ei ravakai tangata. Mei roto mai i teia manako e tuatua ia nei e Iesu Mesia, ka kite tatou e toru au tuanga mamaata ta to tatou tumu tapura e akaari mai nei kia tatou:

1. Ko te iki’anga na roto i te akarongo:
2. Ko te iki’anga na roto i te kauraro:
3. Ko te iki’anga na roto i te matakore i ta Iesu, ka rave:

Kia matakite i ta tatou au iki’anga. No te mea, e manganui te au mea i roto i teia ora’anga te ka riro i te apai ke i to tatou irinaki’anga i roto i te Atua. Kua tupu kia ratou i taito, ka kore atu ei e tupu kia tatou i teia ra. No reira oki a Iesu i aere mai ei ki teiane ao. Ei kimi i tei ngaro ra, ei akaora. Ei akatika i to tatou au kaveinga e tae ei tatou ki te ora mutukore.

Eaa te tumu? No te mea, kua aere ke oki te tangata mei mua i te aroaro o te Atua. Kua iki te tangata i tana i anoano, kua akaruke i ta te Atua i anoano nona. Teia te reo o Iesu, **“Kia inangaro te tangata i te aru mai Iaku ra, e akaruke aia iaia uaorai, ka rave ei i tana satauro i tera ra, i tera ra, ka aru mai ei iaku”** Nako mai ei te reo imene e, **“Ko tei anoano, aere ua mai. E karere teia no te rangi mai. Tera mai te reo, reo mana rai, ko tei anoano rai”** E tutu teia kia tatou i roto i teia tuatau e pera katoa i roto i to tatou ora’anga tavini i te Atua, kia rauka ia tatou te turanga o te aroa i te aru’anga ia Iesu Mesia, e maru ei ta tatou akapaapaa’anga i te akatietie i tona ingoa, ma te rave i te anga’anga na te Atua, e tuatau ua atu.

Te akaari mai nei a Ioane, i te akara’anga tau tikai e marama ei tatou i te oonu’anga o te tuatua o te akapaapaa. Ko te akamaroiroi’anga no tatou i teia ra, koia oki, kia rave tatou i te au mea ravarai na roto i te aroa. Te karanga ra to tatou Manako Maata: **Ko Iehova te Atua ta matou e akatietie, nona te ingoa**



ta matou e akapapaa kare e vata. Te karanga nei Paulo: *“E rave ra i te au ravarai ma te tika e te manea”* (1 Korinetia 14:40)

Uianga:

1. Eaa te vaerua maata i muri ake i te tuatua, Ka aru mai iaku?
2. Kua ariki ainei koe i te reo o Iesu Mesia tei tuatua mai e, aru mai iaku?

RUITORU 7 TIANUARE

Manako Maata: KO IEHOVA TE ATUA, TA MATOU E AKATIETIE, NONA TE INGOA TA MATOU E AKAPAAPAA KARE E VATA. (*In God We Make Our Boast and Praise His Name Forever*) Salamo 44:8

Tumu tapura: KO IESU TE AKAIRO O TE ORA.

Te Au Irava Tauturu:

- Mataio 1:20 – 23: Akaora oki aia i tona au tangata.
- Ioane 2:1 – 12: Akairo anga i te vai ei wina.
- Mataio 14:23 – 32: To Iesu aere anga na runga i te kare.
- Luka 9:12 – 17: Te Angai anga i te 5,000 tangata.
- Ioane 5:5 – 15: Te tangata maki tei akaora ia.
- Ioane 9:1 – 7: Te tangata matapo.
- Mataio 8:5 – 13: Te tavini o te rangatira anere.
- Ioane 11:1 – 44: Ko Lazaro tei akatu ia mei te mate mai.

Tatara’anga:

I roto i to tatou kaveinga no teia ra, ko te akairo me kore ra, ko te semeio mua teia ta Iesu i rave i roto i tana angaanga i teiane ai. Ka kite tatou e tei roto teia i te ngutuare o te nga tangata akaipoipo i tupu ei. Kua marama oki a Iesu i te au peu no te akonoanga o te akaipoipo. E i te reira tuatau e manganui te au ra e rave ia ana te oroa e te tamataora no te akaipoipo, e ka riro te tane akaipoipo i te oronga mai i te kai e te wina no te roa’anga o te tamataora.



Kua pati'ia a Iesu e tana au pipi kia aere ki teia akaipoipoanga, e ko tena i reira tei tupu. Ko Iesu te Tamaiti a te Atua, tei vaitata ua Aia ia tatou. Tei te pae a Iesu ia tatou i ta tatou au angaanga, to tatou au teretere anga, tei roto i to tatou au ngutuare, e te vai atura. Te karanga ra te irava: ***“Kua karanga atura te metua vaine ki te au tavini, Ko tana e akaue mai kia kotou, ka akapera kotou.”*** (Irava 5) Te akaari mai nei Maria i tona irinakianga ki roto ia Iesu ma te tuku i te au mea ravarai ki roto i tona rima. Me anoano koe i tetai tauturu noou, aere kia Iesu, aere mai kiaia ma te kite tikai e, tei roto i tona rima taau e anoano ra. Ka rauka oki ia tatou i te kapiki ia Iesu i roto i te akarongo.

Te karanea nei te Irava 11: ***“Tei Kana i Galilea te rave anga Iesu i teianei akairo mua, i te akakite anga i tona kakā; e kua akarongo te au pipi Iaia”*** Eaa i reira a Iesu i rave ei i teia akairo me kore semeio? Kua tata oki a Ioane i tana Evangelia kia rauka i te tangata i te irinaki ia Iesu te Tamaiti a te Atua. Ko teia au akairo oki, te akakite mai nei te reira i to Iesu turanga Atua. Kua pou te winā a te tane akaipoipo, e kua akariro a Iesu i te vai ei winā meitaki atu i tei tuku ia mai i mua e kare oki e kotinga ki te au mea ta Iesu ka rauka i te rave.

Kua akarongo e kua irinaki takere te au pipi ia Iesu. Kua aru mai oki ratou Iaia mei Iudea mai ki Kana i Galilea, e kua akamatutu te Atua i to ratou akarongo ma te irinaki katoa i au akairo ta Iesu i rave.

Uianga:

1. Eaa te mea puapinga maata i roto i toou oraanga i te akariro'anga Iesu i te vai ei winā?
2. Kua iki ainei koe i te aru ia Iesu i teia ra, e kia rave aia i tetai akairo i roto iakoe?

PARAPARAU 8 TIANUARE

Manako Maata: KO IEHOVA TE ATUA TA MATOU E AKATIETIE, NONA TE INGOA TA MATOU E AKAPAAPAA KARE E VATA. *(In God we make our boast and Praise His Name forever)* Salamo 44:8

Tumu Tapura: KO IESU TE IERO MOU.



Au Irava Tauturu:

- Ioane 2:13 – 25: Kua pou roa au i te maroiroi o Toou nei Are.
- Mataio 27:40: E vava’i au i teiane nei nao, e kia po toru e akatu akaou ei au
- Mareko 15:29: Kua pera mai oki ratou i te avirianga i te akakinoanga ia Iesu
- Ephesia 2:19 – 22: Kare oki kotou i te tangata ke, tei akamouia ki runga i te tango.
- 1 Petero 2:5: Kua patu katoaia kotou i te toka ora ra.
- 1 Korinetia 6:19 – 20: E nao to kotou kopapa no te Atua, tei okoia i tona uaorai toto.

I roto i te rua o te pene o te Evangelia a Ioane kua akakou'ia e rua tuanga. Ko te tuanga mua koia oki, ko te tau'i'anga Iesu i te vai ei wina. Ko te rua o te tuanga koia oki, ko te tuaru'anga a Iesu i te au aronga okooko ki vao mei roto i te Iero. E akatau'anga manako teia i roto i te Evangelia a Ioane. Kare ra teia nga tuanga e rua i roto i teia pene e aiteite ana. Ko tetai, e mea mataora e te maru tona akatauanga. Ko tetai, e tuaru'anga i te aronga okooko i mua i te urupu tangata.

Ko te Evangelia a Ioane, kua akamou ia te reira ki runga i te au apiianga a Iesu, takake mei roto i te apai anga manako a tetai nga Evangelia e toru. Ko Mataio 21:12 – 13, Mareko 11:15 – 17, e Luka 19:45 – 46. Kua akakite ratou e, i te tuaru angaia te aronga okooko i roto i te Iero, ko te tuatau openga ia o te au angaanga a Iesu. Inara i roto i ta Ioane akakite anga, kua rave a Iesu i teia i mua ake i te akamata 'anga o tana au angaanga. Ko tetai akamarama'anga kare e tai ua taime i to Iesu tuaru anga i te aronga okooko kia vao i te Iero, mari ra e rua taime. No reira i riro ei te rua o te angaanga ta Iesu i rave ei riri anga no te au arataki o te ngati Iuda i te makitakita anga atu ia Iesu.

Kare te riri o Iesu i te reira ati'anga e no te moni. Kare katoa oki i te angaanga ngoie na te au tangata i te aere mai ki Ierusalema, i te apai mai i ta ratou au manu ei atinga. No reira e mea tau rai kia rave ia tetai apai anga atinga na ratou e kia oko ia te reira i vao ake i te Iero. Ko te tumu i riri ei a Iesu koia oki no runga tikai i te turanga o ta ratou rave anga i ta ratou okooko anga. Kare te reira



i rave ia na roto i te akono anga tau kia tauturu i te aronga i aere mai no te akateiaa anga ki runga i te au tangata e oko nei i teia au manu.

Ko te manako no te kimi moni na roto i tetai au angaanga taukore, kare te reira i te turanga meitaki. Ko te tika anga o te kimi moni, kia rave ia na roto i te angaanga tika kia puapinga te tangata oko e te tangata nana te apinga. Noatu oki e kare e tata'anga i te akakite mai i te riri o Iesus kua riro ra tana i rave i te akaari mai i tona riri i roto i te irava 12 – 17. Ko tetai tuatau tau katoa teia no Iesu i te akakite anga aia i te tuatua no tona mate anga e tona tuakaou'anga. Ko te manganui anga o te aronga i akarongo ia ia i te tuatua anga e ka akatu akaou aia i te iero i te toru o te ra, kua manako ratou e te tuatua nei a Iesu i te Iero ta ratou e akara nei i teia ra tei akatu ia ki te toka e te rakau. I muri ake i te tuakaou'anga o te Mesia ka kite te au pipi e te tuatua nei a Iesu no tona uarai kopapa, ka tamate ia e i te toru o te ra ka tuakaou aia mei tei akakite'ia i roto te irava 18 – 22.

Uianga:

1. Eaa tetai au akamaroiroi'anga ta Iesu e apii mai nei no runga i te ora'anga kirititiano e te au ngai akamori anga?
2. Eaa tetai au mea ka rave tatou ei akatapu'anga i te Iero o te Atua?

VARAIRE 9 TIANUARE

Manako Maata: KO IEHOVA TE ATUA TA MATOU E AKATIETIE NONA TE INGOA TA MATOU E AKAPAAPAA KARE E VATA. (*In God We Make Our Boast and Praise His Name Forever*) Salamo 44:8:

Tumu Tapura: ANAU AKAOU I ROTO I TE MESIA. (Born Again in Christ)

Au Irava Tauturu:

- Ioane 3:1 – 13: Kia anau akaou kotou e tikai.
- 1 Petero 1:23: No te me akua anau akaouia.
- 1 Ioane 4:7: Ko tei aroa ra, kua akaanau anakeia e te Atua.



- 1 Ioane 5:4, 18: Ko to tatou akarongo e ta te Atua i anau kare ia e rave i te ara.

Tataraanga:

Ko te tuatua anau akaou, tona aiteanga **“mei runga mai”** E angaanga teia n ate Vaerua. Te karanga ra te Irava 5: **“Tika, tika tikai taku e karanga atu kia koe, Kia kore te tangata e anau ki te vai, e te Vaerua, kare aia e o i te basileia o te Atua”**

Tena tetai au akamarama anga no runga i teia Tumu Tapura, anau akaou i roto i te Mesia. Ka kitea te Vaerua tataaraa tikai i roto ia tatou na roto i te irinaki'anga papu tikai i roto i to tatou Atu Iesu Mesia. Kare katoa oki e puapinga e, kia tuatua ua tatou e, kua anau akaou tatou i roto i te Mesia e oti akera te vai nei rai te tara I roto ia tatou. Kua akakite a Paulo i roto i te Galatia 5:16 – 21 e, ko te anoano o te kopapa kare ia e tau ki to te vaerua, te anoano o te vaerua, kare ia e tau ki to te kopapa. Kua akapapu ra aia e, “E te ora nei tatou i te Vaerua ra, e aru tatou i ta te Vaerua. (Galatia 5:25). Ko te Vaerua o te Tumu Tapura, kia tupu akaou te manakonako anga ora i roto ia Iesu Mesia.

Ka akapeea tatou e tupu akaou ei? Okotai rai mataara, kia tataraara to tatou ngakau i mua i te Atua i teia mataiti ou. Ko te rua, kia irinaki tatou ki roto ia Iesu Mesia e Nana uarai e oronga mai i te Vaerua ou i roto ia tatou. Te karanga nei teia takiato tuatua, **“Time for Change”** Teia te reo o Paulo: ***“Tei roto anake te tangata i te Mesia ra, kua riro ia ei tangata ou, kua kore te au taito ra, I na kua riro te au mea ravarai ei mea ou”*** (2 Korinetia 5:17)

Uianga:

1. Eaa taau i marama no runga i teia Tumu Tapura o te anau akaou i roto i te Mesia?
2. Eaa te apiianga no tatou i roto i teia mataiti ou?

POPONGI SABATI 11 TIANUARE

Manako Maata: KO IEHOVA TE ATUA TA MATOU E AKATIETIE,
NONA TE INGOA TA MATOU E AKAPAAPAA, KARE E VATA.



(In God we make our boast and Praise His Name forever) Salamo 44:8

Tumu Tapura: KIA AKATEITEHIA TE TAMAITI A TE TANGATA.

Te Au Irava Tauturu:

- Ioane 3:14 – 21: I aroa mai te Atua i to te ao nei.
- 1 Ioane 4:9: Kua kitea to te Atua aroa ia tatou nei.
- Roma 5:8: Kua akamaata ua maira te Atua i tona aroa ia tatou nei.
- Numero 21:8 – 9: Kua akara ua aia i taua ovi veo ra, kua ora ia.
- Te Aue a Ieremia 3:22 – 24: No te aroa tini o Iehova i kore ei tatou i pou.
- Malaki 3:6: Ko Iehova au, kare au e tuke.
- Ioane 12:32: Kareka kia apai'ia au ki runga, ka toia mai e au te tangata katoa kiaku.

Tataraanga:

Kua akaari mai te Atua i tona aroa i te ao nei na roto i te oronga anga mai i tana Tamaiti anau tai, kia kore e mate te akarongo iaia, kia rauka ra te ora mutukore. Kare oki te Atua i tonono mai i tana Tamaiti ki te ao nei e akaapa mai i to te ao, kia ora ra to te ao iaia. Mei te ovi veo i te akateitei anga ia i te medepara ei akaora ia Iseraela i to ratou au maki tei kakati'ia e te au ovi, koia katoa oki a Iesu kia akateiteia ki runga i te satauro kia rauka to tatou ora mutukore. E tutu oki te ovi no te ara a Iseraela i te medebara e kua pera katoa oki i to tatou Atua ko tei akariroia ei tangata ara no to teiane i ao katoatoa. Na roto ra i teia tutu o te ara, i rauka ei te tataraanga no tatou mei roto mai i te ara o teiane i ao.

E mea tau tikai ia tatou i teia ra, kia akateitei tatou i te Tamaiti a te tangata ra, koia to tatou Atu e to tatou Akaora ko Iesu Mesia. No te mea, ko te pakau aroa aia na te Atua ki to te ao nei, no tona inangaro e no tana ikianga ia tatou kia ora tatou iaia. Te karanga nei te irava: ***“Kua kitea to te Atua aroa ia tatou nei, koia i tono mai i tana Tamaiti anau tai ki te ao nei, kia ora tatou iaia”*** (1 Ioane 4:9)

Uianga:

1. Te peea nei taau akateitei anga ia Iesu Mesia?

koe toku tauturu e toku ora, auraka e tavare, e Iehova.” Tei konei te vaerua o Davida i te kiteanga aia i te tu maata o te Atua.

Ko ta te Atua e inangaro nei koia oki kia amama aia i tona vaa e kia akakite ki te Atua i tana i anoano. E kua irinaki a Davida e, ko te aronga tei kimi i te ora ki te Atua, ka pumaana e ka pereperekavana ia ratou e ka tuatua ratou e; Kia Akamaata Ia Iehova.

Uianga:

1. Eaa te aiteanga e kia akamaataia Iehova?
2. Ka akapeea koe i te akamaata anga ia Iehova i te au ra o toou oraanga?

AIAI SABATI 11 TIANUARE

Manako Maata: KO IEHOVA TE ATUA TA MATOU E AKATIETIE, NONA TE INGOA TA MATOU E AKAPAAPAA, KARE E VATA. (*In God we make our boast and Praise His Name forever*) Salamo 44:8

Tumu Tapura: KO TE AKARONGO I TE TAMAITI RA, E ORA MUTUKORE TONA.

Au Irava Tauturu:

- Ioane 3:22 – 36: Ka tupu aia ki te maata anga, ka oki au ki te meangiti anga.
- Habakuka 2:3 – 4: Ko te tangata tuatu-tika i te akarongo ra, ka ora ia.
- Galatia 3:11 – 12: Kua oti oki tatou i te oko ravaia e te Mesia.
- 2 Korinetia 5:17 – 21: Tei roto anake te tangata i te Mesia ra.

Tataraanga:

Kare atu e tuatua puapinga atu i teia ta Ioane e tuatua nei e, ***“Ko te akarongo i te Tamaiti ra, e ora mutukore tona”*** Koia katoa oki aia i te akakite anga e, ka tupu Iesu ki te maata, e oki au ki te meangiti anga. Kua akaari a Ioane Bapetiso i tona tu akaaka ma te akakaka i te angaanga te Iesu i rave no to teiane ai. Kua riro ia ei mea mataora nona i te kiteanga ia Iesu i tona tupu anga ki te maata i te



angaanga ta tona Metua i tono mai iaia ki te ao nei. Kareka ra i te au pipi na Ioane, kua riro ia ei marama kore anga no ratou i to Iesu rongo maata e tupu nei. Kua akapapu ra a Ioane kia ratou e, ko tana ua, ko te tou anga i te tangata kia Iesu, kare i te kimi rongo nona. Kua akakite aia e, ko ta te Atua i tono maira, ko ta te Atua rai tuatua tana e tuatua. Ko tei aere mai mei runga ra, ko tei maata ia e koia oki te tumu no te ora mutukore.

Kua kite katoa oki Ioane i te nekeanga o te angaanga e tei mouria katoaia mai e te Punua Mamoe a te Atua. Te kite katoa nei oki a Ioane e, kua oti tana teateamamao anga i te ara o te Atua e te to'u katoa nei aia i te tangata kia akamata i te aru ia Iesu katoa ki tana uaorai au pipi. Kua kite katoa oki Ioane e, kare rai aia e tau i te tatara i te itiki i te tamaka o tona Atua, kua taopenga katoa oki Ioane i roto i te are tapekaanga e tae ua atu ki tona mateanga e kua akairi atu tona Atua ki runga i te satauro.

Tei roto katoa oki i te Atu, te tuatua no te Vaerua Tapu e pera katoa i te tuatua no te Kororomotu Ou. Kua akao katoaia oki tatou ki roto i te reira kororomotu ma te kore e vaerua ekoko. Kua mou katoa mai Paulo i te apii mei roto mai i te Peroveta Habakuka i te akakiteanga i te mana o te tuatua tika i roto i te akarongo. Kua kapaiti katoa mai aia i te vaerua o te ora mutukore tei na roto mai i to tatou.

Uiang:

1. Eaa ra Ioane i tuatua i e ka oki aia ki te meangiti anga e ka aere te Atu ki te maata?
2. Eaa te akapirianga o te reira manako ki te tuatua o te ora mutukore?

Responsibilities for this Pure Epetoma

➤ *Contributors:*

- *Sunday 4 – Rev. Tuaine Ngametua*
- *Monday 5 – Rev. Haraveikore William*
- *Tuesday 6 – Rev. Ngatokorima Tehatitiri Joe*
- *Wednesday 7 – Rev. Teava Nanai*
- *Thursday 8 – Rev. Dr. Mata Tumu Makara*
- *Friday 9 – Rev. Panu Rouru*
- *Sunday 11 – Rev. Metu Une*

- *Facilitate/compile contributions/proof-read: Rev. Vakaroto Ngaro*
- *Layout/presentation/cover images & comments on p.2: Nga Mataiao*
- *Compile orders, arrange printing, postage: Mark Ahiao*

